

Novi šef Odjela za povratak i rekonstrukciju (RRTF) sastao se sa ministrom za izbjeglice i raseljena lica Republike Srpske

Peter Bas-Backer, zamjenik Visokog predstavnika i šef Odjela za povratak i rekonstrukciju (RRTF) jučer se u Banjoj Luci sastao sa gospodinom Mićom Mičićem, ministrom za izbjeglice i raseljena lica Republike Srpske. Sastankak, koji je održan u konstruktivnoj atmosferi, upriličen je radi uspostavljanja radnog i partnerskog odnosa između novog šefa RRTF-a i ministra, a razgovor se odnosio na ulogu organa vlasti u RS u vezi sa aktivnostima usmjerenim ka poboljšanju rezultata koji se ostvaruju u procesu povratka.

Šef RRTF-a je izrazio svoje nezadovoljstvo stopom implementacije imovinskih zakona koje je nametnuo Visoki predstavnik. Naime, iako je u toj oblasti zabilježen napredak, još uvijek treba poduzimati dalje napore u vezi s tim. Također je istaknuto da Vlada RS ne pruža zadovoljavajuću pomoć osobama srpske nacionalnosti koje žele da se vrate u svoje domove u Federaciji BiH.

Početkom ove godine Vlada Republike Srpske se obavezala da će povratnicima uručiti 500 paketa građevinskog materijala, ali su do sada podijeljena samo 52 paketa koja su uručena povratnicima u području Glamoča i Drvara, a planirano je da se 31 paket građevinskog materijala uruči u Maglaju i Grahovu. S obzirom da je ove godine hiljade osoba srpske nacionalnosti odlučilo da se vrati, posebno u područja u Kantonima 1, 6 i 10, ovakva pomoć je neadekvatna i prespora. Ministarstvo mora

efikasnije djelovati u pružanju ove vrste pomoći u budućnosti. Ovo je prvi put da je Vlada pružila konkretnu pomoć procesu povratka, ali ta pomoć mora predstavljati više od pukog simboličnog napora.

Šef RRTF-a je upoznat sa činjenicom da je za rad Ministarstva za izbjeglice i raseljena lica RS izdvojeno manje od 50% budžetskih sredstava planiranih na početku ove godine. Javna sredstva se i dalje koriste za izgradnju novih stambenih jedinica u drugim krajevima RS što je neprihvatljivo imajući u vidu obaveze vezane za ubrzanje povratka i podržavanje prava na povratak koje je zagarantirano Dejtonskim mirovnim sporazumom. Šef RRTF-a i ministar za izbjeglice i raseljena lica su se saglasili da je neophodno uspostaviti tijesne veze između međunarodne zajednice i ovog Ministarstva u cilju omogućavanja održivog povratka.

Na sastanku je takođe razgovarano i o konferenciji koja će se 23. oktobra 2001. godine održati u Tesliću sa temom o implementaciji imovinskih zakona. Na ovoj konferenciji nadležna entitska Ministarstva će imati priliku da, putem usvajanja amandmana na imovinske zakone, uvođenja sistema za razmjenu informacija i usklađivanjem instrukcija za privatizaciju stanova, pruže značajnu pomoć građanima u procesu povrata imovine. OHR očekuje da će se na ovoj konferenciji postići konkretni rezultati što će predstavljati znak da entitetski organi vlasti djeluju u najboljem interesu svojih građana i podržavaju proces povratka.